

Īsā^(a.s) Kī Āk̥hīrī Daawat

Injeel : Mattā 26:20-46

Shaam ke waqt Īsā^(a.s) apne baarah shaagirdoñ ke saath dastaraḳḥwaan par baiṭhe the.⁽²⁰⁾ Jab wo khaanā khā rahe the to Īsā^(a.s) ne unse kahā, “Maiñ tumko ek haqeeqat bataatā huñ. Tum me se ek insaan mujhe dhokā degā.”⁽²¹⁾ Ye sun kar unheñ bahut afsos huā. Har ek ne Īsā^(a.s) se kahā, “Sach me, maalik, maiñ āpko dhokā dene waaloñ me se naheen huñ, kyā maiñ huñ?”⁽²²⁾ Īsā^(a.s) ne jawaab diyā, “Wo ādmī jisne mere saath is kaṭore me roṭī ḍubo kar khaayī hai, wahī mere ḳḥilaaf ho jaaegā.”⁽²³⁾ Ādmī Kā Beṭā waise hī maregā jaisā ki muqaddas kitaab me likhā huā hai. Lekin us insaan ke liye kitnī ghinaunī baat hai ki wo Ādmī Ke Beṭe ko dhokā degā. Isse acḥā uske liye ye hotā ki wo paidā hī nā huā hotā.”⁽²⁴⁾

Tab Yahudā, jo unko dhokā dene waalā thā, Īsā^(a.s) se bolā, “Ustaad, sach me maiñ naheen huñ. Kyā maiñ huñ?” Īsā^(a.s) ne jawaab diyā, “Tumne kah diyā.”⁽²⁵⁾ Jab wo log khaanā khā rahe the, Īsā^(a.s) ne roṭī uṭhā kar Allaah taa’alā kā shukr adā kiyā aur us ko toḍā. Unhone wo ṭukḍe apne shaagirdoñ ko die aur kahā, “Is roṭī ko lo aur khaao. Ye roṭī mere jism kī tarah hai.”⁽²⁶⁾

Tab Īsā^(a.s) ne ek pyaalī ko liyā, aur Allaah taa’alā kā shukr adā kar ke apne shaagirdoñ ko diyā. Unhone kahā, “Tum me se har koī isko piyo.”⁽²⁷⁾ Ye mere ahad^[a] ke ḳḥun ke jaisā hai. Isko bahut saare logoñ ke liye nikaalā gayā hai taaki unke gunaahoñ ko maaf kiyā jā sake.”⁽²⁸⁾ Maiñ tumse ye kahtā huñ: Maiñ isko us dīn tak naheen piyuñgā ki jab tak maiñ tum logoñ se Allaah taa’alā kī saltanat me dubaarā mil naheen jaatā.”⁽²⁹⁾ Un logoñ ne Allaah taa’alā kī shaan me qaseedā paḍhā aur phir wo log Yerushalam ke us pahaad par chale gae jise zaitun kā pahaad kahte the.”⁽³⁰⁾

Īsā^(a.s) ne apne shaagirdoñ se kahā, “Āj kī raat tum log merī wajah se apnā īmaan kho doge. Muqaddas kitaab me Allaah taa’alā ne ye farmaayā hai, ‘Maiñ ek charwaahē kā ḳḥun karuñgā, aur bheḍeñ idhar-udhar phail jaaeñgi.’”^[b]⁽³¹⁾ Lekin jab mujhko zīndā kiyā jaaegā, to maiñ tumse pahale Galeel pahuñch jaauñgā.”⁽³²⁾

Unke ek shaagird janaab Patras ne kahā, “Ho saktā hai ki āpke saare maanne waale āpkī wajah se īmaan kho deñ, magar maiñ kabhī bhī apnā īmaan naheen khouñgā.”⁽³³⁾

Īsā^(a.s) ne usse kahā, “Maiñ tumko sach bataatā huñ. Āj raat tum mujhe teen baar pahachaanane se inkaar kar doge aur bologe ki mujhe jaante hī naheen. Tum ye baat murge kī baañg dene se pahale kahoge.”⁽³⁴⁾

Lekin janaab Patras ne kahā, “Maiñ ye kabhī naheen kahuñgā ki maiñ āpko naheen jaantā! Yahaan tak ki maiñ āpke saath marne ko bhī taiyaar huñ!” Aur wahaan maujud saare shaagirdoñ ne yahī baat doharaāi.”⁽³⁵⁾

Tab Īsā^(a.s) apne shaagirdoñ ke saath Gatsamanī naam kī jagah pahuñche. Unhone shaagirdoñ se kahā, “Yahaan baiṭho tab tak maiñ us jagah ibaadat kar ke ātā huñ.”⁽³⁶⁾ Unhone janaab Patras aur Zabdī ke do beṭoñ (janaab Yaaqub aur janaab Yuhannā) ko saath āne ke liye kahā. Īsā^(a.s) ne unse apnā ḡam aur pareshaanī zaahir karī. Unhone janaab Patras aur Zabdī ke donoñ beṭoñ se kahā, “Merā dil afsos se bhar gayā hai aur maiñ bahut ḡamgeen huñ. Tum mere saath yaheen ruko aur rakhwaalī karo.”⁽³⁸⁾

Tab Īsā^(a.s) un logoñ ke paas se thoḍā āge chale gae. Unhone zameen par sajdā kiyā aur kahā, “Yā Allaah! Paalanahaar! Agar ye mumkin hai to mujhe ye takleef nā de. Lekin tu jo chaahtā hai wo kar, wo nā kar jo maiñ chaahtā huñ.”⁽³⁹⁾ Tab Īsā^(a.s) apne shaagirdoñ ke paas waapas lauṭ kar āe aur dekhā ki wo so rahe haiñ. Īsā^(a.s) ne Patras se kahā, “Tum mere liye ek ghañṭā jaag bhī naheen sakte?”⁽⁴⁰⁾ Jaagte raho aur apne nafs kī mazbutī ke liye duā karo. Tumhaarī ruh wahī karnā chaahtī hai jo sahī hai, lekin tumhaarā jism kamzor hai.”⁽⁴¹⁾

Ye kah kar Īsā^(a.s) dubaarā chale gae. Unhone ibaadat karī aur kahā, “Yā Allaah, e paalanahaar! Agar ye mumkin naheen ki takleef mujh se dur ḥaṭe, aur agar mujhe ise añjaam denā hī hai, to maiñ duā kartā huñ ki maiñ wahī karuñ jo tu chaahtā hai.”⁽⁴²⁾ Tab Īsā^(a.s) apne shaagirdoñ ke paas waapas gae aur unko wahaan sotā huā dekhā.”⁽⁴³⁾ To Īsā^(a.s) unko choḍ kar phir se ibaadat karne chale gae. Is baar jab unhone duā karī to unhone wahī duā dubaarā maañgi.”⁽⁴⁴⁾ Tab Īsā^(a.s) apne shaagirdoñ ke paas gae aur unse kahā, “Tum abhī bhī so rahe ho? Baad me sonā! Wo waqt qareeb ā gayā hai ki jab Ādmī Ke Beṭe ko dhokā de kar gunaahgaaroñ ke hawaale kiyā jaaegā.”⁽⁴⁵⁾ Uṭho, hamēñ chalnā chaahie. Wo ādmī jisne mujhe dhokā diyā hai, idhar hī ā rahā hai.”⁽⁴⁶⁾

[a] Jis tarah se Ibraaniyoñ ne qurbaanī kā ḳḥun apne darwaazon kī chaukhaṭ par lagaayā thā jiskī wajah se Allaah

rabbul azeem ne unheñ baḡḡsh diyā thā. Usī tarah se Īsā^(a.s) iskī misaal de rahe the ki ye wo hai jis se tumko maafī milegī. (Taurait : Hijrat 12:1-32)

[\[b\]](#) Taurait : Zakriyā 13:7